

Candu su tempus malu (Ni meris ni serbidoris)

*A Is nebodis mius benientis
e a totu is amigus - in su tempus -
de su gruppu folkloristicu*

Candu su tempus malu picchiat
in is crobetturas de bidde nosta,
e lampus e tronus,
parrit chi a meris 'ollant fai,
is piccioccheddus - si scit -
sonnu no nd'i pigant
e is anzianus nostus,
po ddis fai passai sa timoria,
a custa ainia costumant a cantai. :

Tira pannu tira
Comporaddu in pira
In piras di orti
Izzaraccu bonu
E bonu zaraccu
No siasta maccu
E maccu no siasta
Binu no ndi basta
Mancu ziccadeddu
Ne biancu o nieddu
Zaraccu zaraccu
Zaracch'e casteddu

Gioga
Sposu de nonnu,
gioga,
gioga curri e bai,
puddacchedd'e 'yara senz''e domai,
e ni murus, zirvas
e spentimus ti firminti
e frastimus de bruxus
mai ti calint.

Addudduru duru duru duru stai,
Ei custu pippiu no si mroxiat mai
Mellus chi si mroxiat bacca cun fitella
Ei sa fitella ca sidde papaus
Ei su pipiu ca ddu coiaus
Cun d'una sannora dignia de stimai
Addudduru duru duru duru stai.

Labai, labai,
u' steddu fuiu!
Narami,
ita disigias fillu miu?
Unu Baddarincu, una badrunfedda,
unu carrixeddu o una zaccarredda?
O puru disigias siendas, bois,
e terras de arai?
No' nou... Ma ita seu narendi?
Ma custas funt cosas
chi deu hapu bisau,
e a mengianu, scidendimindi,

mai hapu agatau.
Oh, fillu,
fill' 'e mata prantada de mei:
ahi cumentu fui! e immoi...
cumentu seu!
Ma de su chi nau,
chi ti scarèscias...
no creu!
Seus sardus, genti accappiada
cun cadenas antigas,
a ischina truncada,
ma cun s'anima barrosa
cument' e bois de diferent' arèi
Oh... no m'aspettu de tui
ricchetas chi no' nc'hadi
e chi cind'hadi
no funt cussas chi cicch'eu
ma giusta,
ti 'ollu,
sinzillu,
a conca in artu,
ni meri e ne serbidori,
e chi sa mala sorti
ti fait imbruncuai,
bendidi puru totu ma...
appoderadi s'onori!!

Serra serra, pabas in terra,
pabas a muru, muru su topi,
tottu sa notti, tottu sa di',
fai su lettu e croccadi'

Ab' e s'orcu?
Abi funt is cogas?
Oh... abarra tranquillu,
ca innoi c' e' nannai in caudeba;
margiani becciu,
oll'ast' e struvina
sirboni chi cassadori
ha' mai acciappau.

E immoi dormi,
dormi,
deddu,
ca ambrosu est arribau.

Anninnia anninnia
Custu fillu stimau
Custu fillu adorau
Affortunau siada,
ta bellixedda manu chi no narat tittia
drommi e fai ninninnia...